

1. Ngo Arbosobo Leil Arsae Saexl

Arbosobo arddolcar ngo leil tiur a lei ngo nr saexl, nael yar leil yarzi nawo ngo saexl lei nr saexl seir dder yar ngo leil yar ddei miar bei dae lol ho a bbe.

Ngo holcir dae a, ngo ceiquixl koxl halleix mel Kuimixr hher dae a, ngua dax cir mermi su ca ar hhexr leil anix hier gger dae. Cir koxl sael hier gger ho a, ngo Guxlsixl goxr jjixr lei a, ngo dder yarzi Kuimixr jjixr nia-nr-zzir a. Yar ngo leil hormo quex doxr a lei, ngo yar leil hier gger nr jjixr.

Yel ngo dder ake hher dae a, azo miar ar ddei zo niaxiar doxr dae. Nael halleix mel ngabbor mel cirni-cirni zzipbaer ddayixr a ngama dax zzie doxr, ngama lei yarzi cix, ngo yar dax cirgo a nr hher dae a, yar gielgiel cix. Ngo ye tor seir dder ngama ngua nr mollor zzi leil yarzi perniar, yar azo cixddu zza a lei ngo yar leil cix jjiu, yar leil nge jjiu, yar arddolcar lei ngo dax sol biar doxr, yar ngo leil arddol lei ssi lol nia-nr-zzir.

Argielggur goxr ho a, ngua mermi su ca ar ddei a ca zo jjixr lei a yar dax miar bei ssi lol a, ngua gaxggor carbeix

soler a dder yar dax miar bei ssi nia bbeix har dae a. Yel ngo dder ake jjixr a pia cir, zzaegu geso a ssi niazzir dae a. Nael ngama mel ngo leil ssi lol nia-nr-zzir, yel yar dder ngo dax mae dae a nge doxr, ngo dax sol biar doxr, giedae ngo dder ngama leil zoxlnixr a ssi nr zzae a.

Nael yoxl argielggur goxr a, Arbosobo dixl har dae nixixl ddei ci a. Arbosobo dder ngo ddei arzzi-nimo ddei leil miardal si lei a ngo leil zo lei a bbe! Nael ngo halae nr saexl. Yar ngo leil bbeix, yaa leil almeixr bei gger ssi nei Loxrlovu mul gger ssi eine bbeix. Ngo halae ssi ssi nia xiar dae seir. Nael ngama mel halleix dder arzzi-nimo eil ddei leil saexl ho a. Yar dder ngo leil bbeix: “Yaa ca leil yarzi perniar, ni ssi niazzir arddeirnga a ssi ddo,” eine bbeix a. Ngo dder nr so ni sael xiar a yaa dax cirter a Curxioxr lei a, cirni-cirni yaa dax cirgo a hher dae a, zzor lei yaa dax cirgo a zzor, yixr lei yaa ake yixr.

Ngo yar dax lei hal koxl mel ngo halae ceisir koxl lei bbi gax nr zi seir. Ngo yar dax lei ci ngor xiubbo loxr a ngo jiajia ceisir koxl bbi a yaa ngo leil sessixr goxr gger, ngo eine leilei loxr a sessixr goxr beil a. Halcar saelnei ngo sessixr goxr bbaexl arsaе goxr, sessixr goxr a arsaе lerler

bei saexl. Ngo sul lei qiuxl koxl lar zza goxr, ngo kebal mermi lei zabbar ssi nr goxr, cirza-hanga mel lei zabbar mia nr goxr, saexl nr goxr. Nael hal cir ni ngo, ngo mia nr goxr mel mia a; ngo saexl nr goxr mel saexl a; ngo saexl lar nga nr nga nei halae ngo leil weix a bei. Ngo xiar leil xiar nr seix, yaa ngo ake ca zzae nr nga mel ngo leil eine zeixl perniar. Yaa cirhhexr-larbba lei ngo leil zzaeggu gger, cirke gger a azo lerler gger a lei ngo hol-nr-cir a.

Halleix ngo halae Yisu leil hormosael a nr saexl seir, Arbosobo leil doxl, ngo yaa dax nr lei seir dder bbejjiur goxr a. Nael Yisu nei Arbosobo yaa nnel azo guaxrzoxr ngo nr saexl. Ngo yaa dax cirgo a hher dae a zzo zzor du a lei Arbosobo leil nawo, ngo yaa dax cirgo a miar bei dae a lei zoxlzoxl a Arbosobo ddei ddar mel noni wo ddo, halae eilneixr-nehe miar bei xilmeir leil lei Arbosobo ddei sul ber zza, halae Arbosobo dax ddar biar.

Yar dder ngo leil biex a bbeix, ni Arbosobo leil qiuxr a ni leil azo beijjiu lol niazzir? Ngo dder bbeix, ngabbor leil zzipbaer tor nr dda lol. Yaa dder ngabbor leil Arbosobo dax ddar biar gger, Arbosobo leil qiuxr a, ngabbo leil zzipbar nr dda lol. Nael sir koxl qiuxr doxr a saelnei yar

yarzi zzipbaer nr dda, Arbosobo leil ddarzzi gaxzi a sexlsir.

Eilleix ci a goxr gel lei ho a giedae piar a gga i pox xixl a saelnei ngo saexl. Ngua Arbosobo leil qiuxr dae hal sir koxl xilmeir leil Arbosobo ngabbor leil zzipbaer duax nr pixl lol bbeixarnar, nael Arbosobo arddolcar lei yar leil guaxr doxr dae. Ngo lei giedae ci a ngama ngo leil bbeix gger a sael ngo saexl.

Cir boxl a ngabbor mel zzipbaer ddayixr a yar lo lei nr zza a. Yar dder moxrzzo doxl labox naxcir ar bbie vae si lei a camu nia-nr-zzir. Halleix mel jiajia cei ddaexr zi nga a. Hal cir ni mel ngama nei ngago yaa nr mollor mel mi gga cei ddaexr dae a mercixl neixmar a lei nr jjixr lei.

Mercixl jiur a ngabbor mel ngabbormar dax ar za ddeix jjixr ci a yar dax bbeix ngo ca-nr-mu a bbaexl nrbbanrbba eine arcixl biar doxr a dder jjixr lei a.

Neixmar ho a, ngabbormar lei ngabbor leil zoxrzixr a yar dder ngua ake jjixr lei a ngabbor ake hher hher dae bbe i jjixr lei. Jiajia halcar a mel ngama yaa nr mollor cei ddaexr xixl lei a. Ngabbormar dder ngabbor azo lerler

bbeix a ngama yaa leil biar gger a. Ngabbor mel yarzi ake nr hher dae. Ngama yaa dder zoxrzixr zixldu a. Neix zzae neixmar, bei zzae bei le. Nialngasael vei ddei piar dol a, arddol zo ngexl ssi nia lei nr saexl. Xi giedae nal zzu gga arcixl zo za doxr a lei cir maex lei zo nr wo. Baxlfaxr lei nr zza, yel yoxl cirssor nei ngua dax goxr naer dae ca zzu leil ae a zo jjiu ssi lol. Neixmar arcixl loxr ho a, nalbbor suixlkuxl dax ssi ggie ggaxrleixrmo peixl gga zo ci a, ngabbor dder nalmaex jjixr lei a. Halcar ngama dder middur ddei leil taxr zei dae a bbeix: “Arbosobo leil nawo a; ngabbor leil azo sirzzi nr ddux lol.” Halcar yaa halae Arbosobo leil nr saexl seir, nael arzzi-nimar arzzi-nimo mel yaa leil Arbosobo dax arsaе qiuxr gger doxr dae nr saexl. Arbosobo yar leil guaxr dae a yar leil hier xixl lei.

Ngua leil zo jjiu su ca zzu ngabbor leil bbeix: Ni arddol jjixr lei? Halcar mel ngabbor mel zzubbaer ddayixr a yar azo bei dae yar lei nr saexl dae a. Yel halcar yar dder bbeix: “Ngo jjixr lei a hexzzi vei jjixr lei; yar bbeix, neir zzu yar leil bbeix ni hexzzi lei nr vei mel ngua dax lei,” eine bbeix a, yar dder naxcir bbie lixrbbax dax kerzi dae a, hexzzi vei jjixr lei. Jiajia halcar malmal ngua leil zo jjiu

su ca mel yoxl yar leil mia ggur, Arbosobo leil yarzi nawo eil ddei mel dder Arbosobo guaxr dae a nga arddeir a.

Yel yaa dder ngabbor leil naxcir bbie arddolmaex kerzi dae biex. Ngabbor dder yaa leil hier dae a zo jjixr a, naxcir bbie yarzi lixrbbaex cili gga sixzzei ar zzei dax kerzi dae. Ngama ngo leil eine biar gger ho a ngo dder Arbosobo yarzi niul yar dax ddar biar dae mel leil noni dae bbe saexl a. Yel ngo yoxl Arbosobo leil ardoxr saexl dax a. Hal cir koxl Sexldaxljiexr ci a ngo dder sexlsir a. Halae Xiqiti ci a dder zoxlzoxl a lei jiaxlhuixl gga ssi.

2. Arbosobo Ngo Leil Nixmox Zzar Gierbox

Ngo Arbosobo leil ddarzzi beil halleix, Xiqiti leil ci a ngo dder jiaxlhuixl gga ssi dae. Nael halleix ngo jiaxlhuixl gga Arbosobo leil vi-nr-sser dae. Ngo lei yarzi ssi lae, yaa lirbaexl bei dae ho a sael ngo ssi ci. Halae yaa Arbosobo ddei ddar biar a lei ngo hormosael a noni wo nr xie. Ssi beil a ngaseir a, caxlgo mel lei ngo caxl nr var. Lirbaexl bei su mel lei camar lillil a nga, leixlsu lei ar ddei nr zza. Yel arzzi-nimo mel ngo leil jiaxlhuixl gga ssi nia bbeix gger a ngo ssi dae arnar, ngo arddolyox ar ddei noni nr wo. Ngo Arbosobo leil ddarzzi beil a ngaseir dder ngo

ddei arzzi-nimo ar ddei a ngo leil mul gger a bbeix, Arbosobo leil ddarzzi su mel zzirbae bei wo a cei fel ddei gga Arbosobo leil ar fel gger nia. Armael hoba sser nr nga nei, hoba Arbosobo leil gger a mel, yar dder ni leil hanol seir lol, eine bbeix a. Yel ngo dder ddar eil mel holcir dae a, nael halleix ngo Arbosobo leil lalal a ddarzzi. Giedae ngo gozi faex teixl lei a soxiu (300) pir faex wo a, yel ngo lei socei (30) pir vei dol har dae a, jiaxlhuixl gga ssi a, Arbosobo leil gger niazzir dae. Nael lirbaexl bei teixl a ngo zzirbae dol ji ggie ddei dax ssi gel a dol ji car a, ngo yoxl korseil a maelmaerjjia nr gger, ngor pir vei xixl lei a nrzeingor pir lar dol ji gger. Nael ngo Arbosobo leil nawo a; yar ngo dax yarzi ssertexr zza. Yar ngo leil xia doxr dae a ho bei ho yar leil saexl dax lol, ho bei ho vaer du lei lol. Ngo nei ngo ddei arzzi-nimo ngua nrnel jiaxlhuixl gga argielggur ssi ho a, jiaxlhuixl gga miar guaxr su mel dder ngua leil bbeix a yaa caxlgo caxl su mel dax cirgo a caxl dax ssi. Nael yaa caxl dae caxlgo hal mel ngo noni dae a yarzi noni sol, yel ngo caxl nr meixr. Nael yaa ddoddo-nrddo bbeix a, ngua nr boxl sael caxl dax ssi a. Nael giedae ngua caxl dax nia-nr-zzir a, ngua yoxl bir halleix leil lei ssi lae, yaa caxlgo caxl teixl ho a sael ssi, cirdaedae

a, ngua ggucirmi ssi ci a lei, arleixr ngier ho a saexl ddir. Ngua jiaxlhuixl eil ddei gga seirseil argielggur ssi ho a lei, zoxl a camar lar nga leixlsu nr zza. Yel arzzi-nimar arzzi-nimo mel yoxl ngua leil kebal jiaxlhuixl bbeix gger a, ngua yoxl kebal lei so li maex ssi a, arsaesael nga bbe i ssi, nael ciryoxr sael a nga, hal nrmel sael gga gielgiel ca nganiul. Yel argielggur ssi ho a ngua yoxl ngua ssi beil jiaxlhuixl eil ddei gga jjixr lei a. Giedae 2006 nixr sexldaxljixr ci a ngo dder sexlsir a. Giedae ci a, jiaxlhuixl eil ddei gga dder Arbosobo ddei sul zza lei su ar mel lei a, leixlsu ar mel zza du lei a, ngua dder yaa dax cirgo a gaxggor, yaa dax cirgo a caxlgo caxl, ngo dder Arbosobo leil ardoxrdoxr visser du lei a. Eine ar boxl a, ngo ddei arzzi-nimo ar ddei a ngo leil hier dae a Kuimixr ssi. Yar ngo leil hier dae a jiaxlhuixl gga ssi a, hal cir xixlmei mel, leixlsu mel caxlgo caxl a Arbosobo leil bbeixzae gger, yaa ca lei yarzi miur, leixlsu lei yarzi miur, ngo yaa caxlgo caxl ggie noni wo a yarzi noni zae, ngo lei yarzi caxl nolnger. Halcar a saelnei ngo jiaxlhuixl gga ssi nolnger du lei. Ngo hher ggie lei yaa sael a Arbosobo leil visser su eine ar cir zza bbaexl ngo lei yaa dax visser dax nia eine xiar du lei a. Giedae ngo Kuimixr ssi ggur a lei zoxlzoxl a jiaxlhuixl gga ssi a caxlgo caxl ssi.

Halleix ngo jiaxlhuixl gga ssi a, ngo dder ngo azo li wo ddo xiar lalnga, ngo Arbosobo leil azo bei gger cexr xiar nr goxr, nael Arbosobo ngo leil kebal ca mel yar leil arsae visser i wo lol a, ngo leil lei ngo yar leil arsae visser cexr xiar du lei lol a. Giedae zzizzi a ngo dder jiaxlhuixl gga Arbosobo leil visser dae a. Ngo Arbosobo ddei caxlgo mel noni meixr, ngo lei arzzi-nimar arzzi-nimo mel leil hier dae a caxlgo caxl a Arbosobo leil visser. Ngo lei Arbosobo dax ddar biar meixr, cirdaedae a ngo leil arzzi-nimar arzzi-nimo mel leil Arbosobo dax ddar biar gger a Arbosobo leil eine visser. Cirdaedae a ngo lei jiaxlhuixl gga lei anix mel leil hier, yaa dax cirgo a gaxggor, yaa leil caxlgo caxl mul gger, huade tiuxl mul gger. Yaa lei yarzi ngo dax gaxggor ggese, ngo lei yarzi yaa dax gaxggor ggese. Ngo Arbosobo leil nawo a; yar ngo leil, yar ngo lei bbesur gger dae mel leil zo wo lol a, yar leil visser lol. Halleix ngo jiaxlhuixl gga ssi a, arzzi-nimar arzzi-nimo mel eil yoxr bei nr ci, hal yoxr bei nr ci mel leil i lalnga, yel ngo dder jiaxlhuixl so liler ssi a lei, ngo nolnger dae mel zo nr wo. Nael ngo Arbosobo leil nawo a; yar, yar xiar dae ddei dax zox dae a ngo leil arzzi-nimar arzzi-nimo mel arsae Arbosobo yaa leil bbesur gger mel

dax zox dae a Arbosobo leil visser mia lol, Arbosobo lei ngo leil ngo arsae ngo bei mibbe mel dax zox dae a yar leil visser nia saexl lol. Halleix ngo nixmox zzar gier-nr-box a ngo dder azo li wo ddo xiar lalinga, ngo azo ggerddu zza xiar nr goxr. Arbosobo leil nawo a; yar ngo nixmox zzar xiar dae mel hoba gierbox a, ngo bei dae mel leil lei gierbox. Arbosobo ngo leil zeixleixr yar leil azo visser dax lol ngo nr saexl, nael eilleix yar ngo leil miar bei lol dae mel ngo yarzi bei ggese. Yar ngo leil seirseir meixl gger dae mel lei yarzi miur, ngo cirza-hanga lei sser loxr ddo. Ngo hoba Arbosobo ddei meirne fel Arbosobo leil gger a, Arbosobo gielgiel ngo leil zzeilil-zzeilor gger, ngo leil cirza-hanga lei sser loxr ddo lol, halae yar leil weix a, seirseir bei ssi ddu zza lol. Arbosobo leil nawo a.

3. Arbosobo Ngo Leil Capor Gger

Ngo Arbosobo leil ddarzzi ho a, Arbosobo leil ddarzzi su arzzi-nimar nei azzi-nimo mel lei ngo leil mul gger a bbeix: “Arddolcar a ni capor zo a mel arsae bei lei Arbosobo leil ddarzzi su mel leil zo nia, Arbosobo leil saexl su mel nrbba-nrbba bei ssi nr var,” eine bbeix. Nael Arbosobo leil ddarzzi su capor mel yarzi nganiul, xilmeir hal nr koxl

sael mel ngo zoxlzoxl a jiaxlhuixl gga ssi dae lei, Arbosobo leil ddarzzi su leixlsu mia nr goxr, camar lar miur. Giedae ci a nael, kebal mermi Arbosobo leil ddarzzi su ar mel a Curxiuxr Arbosobo ddei sul ber zza lei a, ca hal mel gga doxl Arbosobo leil ddarzzi su caleixlssor ar mel zza. Nael lei beil a ngaseir mel yaa lei ngua leil nr saexl, ngua lei yaa leil nr saexl. Argielggur goxr ho a zzi dax ardoxr cuaxrpxr dae a nael, yaa lei ngua leil yo a yaa dax cirgo a arboxlboxl gaxggor ssi. Nael yarzi hoxrsil hal mel ar ddei pex nr dae. Arbosobo leil ddar-nr-zzi su hal mel doxl nr soler pex dae a. Nael hal mel mel yi zzae yi dda zzipbaer zzae zzipbaer dda, yaa dax nr boxl sael gaxggor ssi a giedae ngo dder ssi nia-nr-zzir a. Yel yaa ngo leil dixlhuaxl ddaexr gger a ngo leil yo a lei ngo dder nr ssi a. Ngo zoxlzoxl a jiaxlhuixl gga ssi a, Arbosobo leil miar bei gger su mel Arbosobo ddei ddar mul gger ggie miar a, ngo zzirdae a yaa miar bei dae mel yarzi seir, arddolcar a ngo capor lei miar eil mel bei arddeirnga a dder seir a. Halcar a ngo dder Arbosobo dax ddar biar a bbeix: “Arbosobo ngo ni leil visser bbesur nr zza, nael ni ngo leil ni leil visser su capor ar ddei pex dae lol a, ngo yar leil beijju a ni leil visser,” eine bbeix a. Giedae cir nr koxl goxr a, ngo

jiaxlhuixl gga Arbosobo leil visser su leixlsu ar ddei pex dae a. Yar dder ngo ddei dixlhuaxl hoxlmar biex a ngo yar leil bbeix gger a. Argielggur goxr a yar ngo leil dixlhuaxl ddaex gger a, ngo leil yo a cirgo a gaxggor ssi. Ngua dder cirgo a nr boxl sael gaxggor ssi a. Ngo zzirdae a ngua nnel zzi dax seir var, nael nr seir, giedae yar vimir ggie ssi a. Ngo lei Arbosobo ngo leil tiur har gger dae ddei arsae ar ddei a nr saexl a, yel halleixl ngo nixmox zzar arleixr zzasol a. Nael Arbosobo bei har zaxr dae mel mel niul ca mel xiar lei xiar ci nr xie. Giedae jiaxlhuixl gga yoxl Arbosobo leil visser su leixlsu ar ddei lei a. Yar jiaxlhuixl eil ddei gga nr lei seir dder ngo yar leil bbejjiur goxr a. Halae yar kebal su ssormaer ar ddei dax seir dae lei ngo bbejjiur goxr a. Yar hherdder Arbosobo ngo leil tiur har gger dae capor ddei nga ngo xiar lei xiar nr ci. Cir ni a, lirbaexl bei teixl ho a, ngua arzzi-nimo nnel sael a cirgo a gaxggor dae a, yar ngo leil dixlhuaxl hoxlmar biex a ngo yar leil bbeix gger a. Nael ngo lei ardoxr murgur dae, yar ngo leil dixlhuaxl hoxlmar biex a mel azo bei niazzir dae. Giedae nr ni sael goxr ho a, yar ngo ddei arzzi-nimo ar ddei leil ngo leil dixlhuaxl ddaexr gger lol bbeix: yar ngo leil yo a almeixr zzor ssi a ngo ssi yuex yuex? Ngo dder

bbeix: “Yar kebal ssormae dax seir dae mel arsaeng ngo leil yo a yar dax cirgo a almeixr zzor ssi lol leir?” Ngo ddei arzzi-nimo hal ddei ngo leil biar gger a sael ngo saexl, yar mel ssormaer hal ddei dax nr seir dae ho a. Giedae ngo dder yar dax cirgo a almeixr zzor ssi, yar dax cirgo a gaxggor ssi. Ngua zzi leil argielggur saexl ho a, yar lei yar ddei cirza-hanga mel ngo dax biar, ngo lei ngo ddei cirza-hanga mel yar dax biar. Ngo zzirdae a yar dder Arbosobo ngo leil tiur har gger dae capor ddei nga a. Yar zzirdae a ngo lei Arbosobo yar leil tiur har gger dae ssormaer ddei nga a. Ngua nnel dder zzi dax seir dae a. Ngua nnel cir koxl sael seir ho a dder jiexrhui a. Ngo Arbosobo leil nawo a, yar ngo yar dax ddar biar dae mel leil noni a, yarzi ngo leil yar leil visser su capor ar ddei gger a. Eilleix ngua capor maerssor nnel jjia lei Arbosobo leil visser a ngo yarzi ggese.

4. Arbosobo Ngo Leil Xi Gger

Ngo jiajia jiexrhui hal nr koxl mel, ngua mel ngo capor miar bei ggie halmaex hher dae. Ngo Arbosobo leil nawo a; yar ngua leil bei har zaxr gger dae a, ngua zzirbae lei nr ddux lei halmaex nr koxl hher a. Halleix mel ngua nnel

jjia lei koxltor nor seir. Nixixl goxr a lei arsaе goxr nia lei nr saexl. Yel xilmeir hal nr koxl mel ngua nnel jjia lei ssormine hier nia-nr-zzir. Nr koxl goxr a ngua zzirdae a ngo capor halmaex miar bei doxr dae cexr, ngua lei halmaex hher zei si cexr. Yel ngua nnel dder ssormine hier niazzir. Ngua dder Arbosobo dax aniuх ar ddox qiuxr. Cir nr xiubbo sael goxr a, Arbosobo dder yarzi ngua leil aniuх gger a, ngo dder aniuхniar a. Nael xiar lei xiar nr ci, ngo aniuхniar ngexl so (3) xiubbo loxr a qie, ngo capor halmaex gga miar bei nr cexr a; ngua lei halmaex hher nr cexr a. Cirleixr dder arsaе bei nia lei nr saexl a. Hher ggie zzael, hher ggie zo ssi nia; miar zzael, miar zo ssi nia; ngo zzael, aniuхniar dae ho a. Ngo nixmox zzar lei yarzi zoxrzixr. Giedae ngo yoxrmo nei ngo capor ngua so mollor dder zzarvul-zzarmae xi zo ssi a, xi zu niazzir. Nael zzael, nr maex sael zo a lei hoxrsil ar maex zo nr wo. Yel ngo dder ngo capor dax zzibbe a bbeix: “Nrnga a nael, niul zzirbae cir dax a xi li ar tox vae lalssa a. Xi zu a mel bacixl-bage ba doxr nia a maxrfaxr, halae aniuх hier a lei ake jjixr a hier jjixr nia. Ngo capor lei ngo yar dax zzibbe dae ddei ddarkoxl a. Yel ngua dder Arbosobo dax ho qiuxr ho xi zo, ngua halae xi vur su mel leil zzirbae gger a yaa

ngua leil hier dae a xi i ssi. Cir ni a, arzzi-nimar arzzi-nimo nrmel sael a ngua leil xi i jjiu ssi. Hal cir ni ngua so li maex i a; halae yarzi perniar, ngua lei arddolmaex vae nia nr saexl. Nael nr ni sael goxr a, ngo capor nei ngo yoxrmo yaa nr mollor yoxl xi zo ssi a, Arbosobo ngua leil beijjiu a, eilleix ngua hher ggje eilmaex leil zo wo a. Hal cir ni mel, ngo mel saxlba dae a, ngo capor ngo leil diaxlhuaxl ddaexr gger a i ssi lol, yel xiaxlba ho a ngo lei i ssi a. Nael halleix ngo lei Arbosobo ngua leil halmaex hher lol a azo bei lol niazzir dae nr saexl. Ngo i ssi ho a ngo dder xi ha tox leil li-nr-zoxr, nael ngo capor lizoxr. Yar ngo yoxrpor leil dixlhuaxl ddaexr gger a i lei lol. Ngo yoxrpor lei bbeix ngua i lal a dder ddo a eine bbeix a. Halmaex mel bir ngua kebal i hal mel leil ardoxr perla, yel arleixr xiar a ngua dder li dae a. Xi vur su mel bbeix li arddeirnga a hoba yaxji jia nia, yel hal cir ni ngo yoxrpor dder ngua leil yaxji jia gger a. Nr ni sael goxr a mel yoxl zzirbae sixrwaxl jia a faxrcar zexl baxl. Nael ngua zzirbae zaxr dae doxr jia loxr nr ddo, yel ngua yoxl ake jjixr a ngua cirssor mel dax zzirbae cir dax jjixr. Nael Arbosobo leil nawo a; yar ngua leil bei har zaxr gger dae a, ngua cirssor mel lei ngua leil yarzi cir gger ggese. Yel sixrwaxl

ddei nael cir loxr a, jia ho a faxrcar zexl ddei baxl wo a. Nael ngua nnel mel xiargo bei su lar nga a, faxrcal zexl ddei zza ho a lei yixrhaxr gga zzirbae daexl wo nr ddo. Yel yoxl arsae bei nia lei nr saexl. Nael Arbosobo ngua leil gger dae mel bir ngua yar dax qiuxr dae mel leil lei miur leixl, yar ngua ddei cirssor ar ddei leil sser dae a ngua leil beijjiu. Curxiuxr daexl wo nr ddo a, ngua ngo capor yaa dax halbbaer daexl jjixr a, sixrwaxl daexl wo a. Yel xi vur su hhexr leil gger jjia a. Yel hal cir ni dder xi tox yaa ngua leil jia gger a. Ngua mel hher ggie nr zza a, ngua hal cir ni dder ba dil a. Ngua 2012 nixr 8 yuefei gga ba dil a, 12 yuefei gga ci a ngo dder ngo ssormaer leil xiu a. Arbosobo leil yarzi nawo, ngua vae si lei a ba dil a qie hher dae a eilleix hher ci a lei yarzi hher seir. Halleix vae car xi hal tox ardoxr li a, ngo li-nr-zoxr; nael eilleix ho hher ho, ngo zzirdae yarzi hher seir, ngo miar bei ggie dax lei yarzi naer. Ngua ggucirmi ddux a qie hormo yoxr caezi lei cux wo ddo, arddol ssi lei yarzi ssi seir, halae arzzi-nimar arzzi-nimo mel Curxiuxr lei a ngua dax lei a lei yarzi lei seir, sul zza ggie dax, no i ggie dax lei yarzi naer, ngua xiar nr ci seir hal mel leil Arbosobo ngua leil bei har zaxr gger dae ho a. Halleix Arbosobo ngua leil eilmaex hher lol

a azo bei lol ngo nr saexl, nael eilboxl ngo saexl a, yar ngua leil arzzi-nimar arzzi-nimo leil hexl lol, yaa leil beijjiu lol. Ngo Arbosobo leil nawo a, yar ngua leil xi gger a, ngua zoxlzoxl a arzzi-nimar arzzi-nimo leil qie a ngua dax zzo zzor lei lol cexr, ngua dax gaxggor lei lol cexr. Ngo Arbosobo leil nawo a; yar ngua leil yar leil eine visser lol.

5. Cirza-Hanga Lei Arbosobo Bei Har Zaxr Dae Ho A

Ngua xi vae a zzei cirke ca dae, yel cirdaedae a ngo zoxrzixr a yixrmeix leil hormosael a jjiu nr ddo. Halleix ngua nnel jjia lei miar bei dae. Nael zzirbae yarzi nganiul. Ngo capor jiaxlhuixl gga Arbosobo leil visser dae, nael ssi beil hal so xiubbo mel jiaxlhuixl gga yaa leil zzirbae nr gger, giedae so xiubbo nael so xiu pir cir xiubbo gger, so xiubbo goxr ho a nael yoxl qiuxl xiu pir cir xiubbo gger. Nael ngo Arbosobo leil yarzi nawo. Yar, yar leil perniar su ngo ddei arzzi-nimar arzzi-nimo mel leil sser dae a ngua sser zoxr mel ngua leil gger. Ngua li niazzir dae maelmaerjjia yar ngua leil gger nr jjia, nael ngua bbecir-bbeni sser zoxr mel yar ngua leil gger. Ngua arddolcar almeixr zzor jjia, ngua arddolcar a hor zzorddu nr zza a

lei Arbosobo saexl, yar dder yar leil perniar su arzzi-nimar arzzi-nimo mel leil sser dae a ngua leil ho mal gger lei lol. Arzzi-nimar arzzi-nimo eil mel ngo yaa mi ddei biar nr teixl lei, nael ngo ddarzzi arddolcar a niul merhhexr gga jjixr ci a, Arbosobo worcixl-worni yaa mi ddei ae teixl lei nia, yaa li wo mibbe mel arsaе bei lei yaa leil gger nia. Ngo mel ngo ssormaer leil nr xiu hozze saxlba doxr dae. No i su mel ngo leil bbeix gger a bbeix: 12 yuex goxr jjia ddo jiur a ngo ssormaer leil hier ddo a piar a, eine bbeix gger. Yel ngo halae xiar dae a maelele hal nr goxl xiqi nael ngo lei miar nr bei wornol lalnga. Nael Arbosobo bei har zaxr gger dae mel ngo xiar lei xiar nr ci, yar cir ni lei danr-wo lol. Ngo Xiqivur cir ni lei miar bei dae seir, nael Xiqiluxr cir ni dder yiyuxl gga ssi a. Xiqiluxr cir nehe mel ngo yoxrmo nei ngo capor ngua so mollor mel var vae ssi, ngo mel cirleixrleixr a xilbe ardoxr no dae a; nael ngo lei xiu no no dae a nr saexl, yel yaa leil lei bbeix nr gger. Giedae zzocir zzo ji ho a saelnei yaa leil ngo xilbe no bbeix gger. Ngo yoxrmo bbeix xiu niazzir dae a xiaxlzi a; nialnga yiyuexl gga ssi nia a bbeix a, ngo capor dder ngo leil hier dae a yiyuexl gga ssi. Ngua yiyuexl gga ssi ci a, ngua dder ngua ddei arzzi-nimar hal ddei leil dixlhuaxl

ddaexr gger a, yar lei a ngua leil beijjiu a ngua cirleixr dder cirza-hanga lei baxl har a. Ngo yiyuexl gga zuxl ji dae ho a mel sixldir ci a. Ngo Arbosobo leil nawo a. Yar ngo leil beijjiu a cirza-hanga baxl a lei cirleixr lei da-nr-wo. Ngua dax cirgo a zuxl carbeix hal hhexr mel anix xiu teixl lei ho a lei yixr ggie nr zza. Nael Arbosobo ngo leil beijjiu a cirza-hanga lei bei har jjia ho a sael ngo ssormaer leil xiu. Xiqiluxr cir ni sixldirbaxl ngua cirza-hanga lei baxl har a ngo yiyuexl gga zuxl ji dae a. Hormo arleixr nr goxr, ngo yoxrmo nei ngama yaa lei lei a, yaa ngo dax cirgo a hher dae a. Ngo holcir dae a ngo yarzi no wor nr ddo nr zza. Hal cir xixlmei sixraeldir ci a, no i su ddei ngo leil anix xiu ggie ddir lol a. Ngo cirmuzil a nalzzar hher dae a ngo xilbbe no du lei a, ngo dder Arbosobo leil ae dae a ngo leil beijjiu lol. Ngo holcir dae a ngo yarzi no so boxl no a dder ngo ssormaer leil xiu teixl lei a. Yar leil xiu teixl lei a qie yar yarzi nge worni waerwaelwaer nge dae a. Yar leil xiu teixl lei car a mel, anixci zex yar leihher ddei leil nr za ssox gex dae, nael ngo Arbosobo leil nawo a, Arbosobo yar olga ddei leil guaxr dae, yar yarzi seir, arsae lei nr nga. Arbosobo halae yar leil perniar su arzzi-nimar arzzi-nimo mel leil

sser dae a cirza hanga lei ngua leil bei har zaxr gger dae a. Yel ngua azo lei vae nr ssa. Ngua yiyuexl gga ngor ni hher a dder ake jjixr cexr a. Arbosobo leil yarzi nawo a; yar ngua leil beijjiu a zzirbae lei lalal a sser. Maelmaerjjia a lei 1,500 pir lar sser, giedae yoxl 900 pir boxl wo a, ngua ddei zzirbae mel 700 pir lar sser ji. Arbosobo mel cirza-hanga lei bei har zaxr dae ho a. Eilleix ci a ngo ssormaer li koxl loxr ho a lei ngua azo sser loxr nr ddo zza nr goxr.

6. Arbosobo Pex Nr Dae Lol A Mel, Azo Lei Pex Dae Nr Var

Ngo holcir dae a, halleix ngo capor mel jiaxlhuixl ar ddei gga visser dae. Yar jiaxlhuixl eil ddei gga lei beil hal so xiubbo, jiaxlhuixl gga yar leil zzo zzor per lei nr gger. Halae halleix mel ngo, ngo ssormaer leil xilbe gga ji dae a lalal sael a saxlba dae a zzirbae lei lalal sael a zza. Zzei zzae, zzei koxl gger nia, yel ngo lei cirni-cirni yar dax zzi hie doxr, yar leil bixr doxr, nael ngo arsae cor lei yar dder jiaxlhuixl gga visser ssi. Yar bbeix yar ngo leil gger du nr xie mel, Arbosobo ngo leil gger var. Giedae so xiubbo goxr a jiaxlhuixl gga yar leil cir xiubbo so xiu pir gger, nael ca

dax bbeix ci a halae yarzi nganiul, jiaxlhuixl gga azzi-nimar arzzi-nimo mel lei bbeix jiaxlhuixl gga zzirbae nr zza a, ni leil eine cirdoxr a ggerddu zza, ni miar ar ddei zo ssi a miar ho bei ho Arbosobo leil visser. Yaa mel cir boxl lar bbeix nr nga a nei zoxlzoxl a eine bbeix. Eilleix ngo xiar du lei a ardoxr vaessiddo, yaa cirni-cirni Arbosobo dax ddar biar a zzael bbeix, ca cirke-cirke tiur teixl lei a ni leil visser lol eine bbeix. Nael Arbosobo yar leil visser su ddei leil lei lol a zzael, yaa yoxl yar leil quex a miar zo ssi lol. Jiaxlhuixl gga zzirbae nr zza nr nga, yaa zzirbae maelmaerjjia sser a jiaxltaxr zi niazzir, yel Arbosobo leil visser su mel leil worper ggerddu nr zza. Nael eilleix ci a lei jiaxlhuixl eil ddei halae jiaxltaxr zi nr du lei seir. Giedae zeixleixr so xiubbo goxr a, jiaxlhuixl gga miar guaxr su mel yoxl zzubbe a yar leil cir xiubbo qiuxl xiu pir gger a. Yar dder yilzi a jiaxlhuixl eil ddei gga visser dae a. Ngo lei zzirdae a yar yilzi a jiaxlhuixl eil ddei gga visser zei si var. Nael Arbosobo xiar dae ddei mel arseir lei xiar nr ci. Giedae jiaxlhuixl hal ddei gga miar guaxr su ddei arjjiuljjiu a yar leil bbeix, jiaxlhuixl gga ni leil zzirbae ggerddu nr zza, yel ni leil nr li a. Ngo ddar eil qir bbejjiur a sirzzi zildu a. Cir xiubbo leil qiuxl xiu pir eil

doxr mel azo suax bbeixleir? Kebal saxlba ssi dax bbeix ci a mel nganiul zildu ho a mar! Halae yar leil nr li bbeix teixl lei a lei vaessiddo. Nael eilcar saelnei ngo saexl, Arbosobo ddei sul ber leil bbeix, zzirbae leil lei visser, Arbosobo leil lei visser eine mel nr cexr. Ngua pex dae eil mel hherdder Arbosobo ngua leil pex dae lol arddeir a. Yar ngua pex dae eil mel leil sser dae a, ngua leil tiur lol, ngua Seirpor leil visser bbeixsael zzirbae leil visser. Halleix mel ngua Arbosobo leil visser dae nr nga a nei, Arbosobo ngua leil zza lol mel zza dae lalnga seir. Eil mel zza jjia ho a sael yarzi Arbosobo ddei miar bei. Yar jiaxlhuixl hal ddei gga ddux lei ho argielggur loxr a, kebal jiaxlhuixl ar ddei a lei yar leil qie a jiaxlhuixl gga visser ssi lol, nael yar lei ssi ssi nia nr saexl, yel yar dder bbeix: “Ngo hoba miar ar ddei zo ssi a miar ho bei ho Arbosobo leil visser,” eine bbeix a. Yel yar dder jiayoxyzaxl gga miar ar ddei zo wo a halmaexl saxlba dae a. Nael yar cir xiubbo saxlba ho a, gozi faex zi ci a, yar miar bei carbeix zzu mel yar ddei zzirbae ker, jiajia yar cir xiubbo meirne ddei zzirbae ker. Yel hal xiubbo yar dder miar nr bei sael a nga a. Hherdder Arbosobo ddei sul ber leil bbeix dae mel sael a nga bbeix: “Xi eil zzir Arbosobo zi nr nga a mel

zi su ca ddei dder baexr a zi lalnga, zzi eil ddei Arbosobo su dae nr nga a mel, su su ddei dder baexr a su dae lalnga,” eine bbeix a. Yar dder Arbosobo yar leil azo bei lol niazzir dae saexl a. Yel yar halmaex saxl-nr-ba, jiaxlhuixl gga visser jjixr lei a. Nael Arbosobo xiar dae mel mel arseir lei nr saexl, yar jjixr lei a qie yar ddei worper ddei Arbosobo yar leil koxl gger, hherdder yar miar bei carbeix mel yar ddei ker si hal mel nga a. Arbosobo yar leil yarzi perniar, yar Arbosobo yar leil zza lol mel zza wo ho a, Arbosobo yar leil halleix jiaxhuixl hal ddei gger dae worper nr peix miur gger. Ngo zzirdae a Arbosobo miar bei dae mel niul xiar lei xiar ci nr xie, niul ca mel mel maelele ci a arsaenga hal ddei leil i lalnga, nael Arbosobo mel arsae lerler bei eil mel leil i. Halleix eil mel pex dae car a, nixmox zzar yarzi zzasol a, ngo nge doxr, cix doxr, ngo capor dax zzi hie doxr, halae Arbosobo leil lei boxyoxr doxr. Nael ngo eilcar holcir du lei a Arbosobo leil nawo nia. Arbosobo ngua cirza-hanga pex dae eil mel leil sser dae a, ngua leil yar ngua leil mul gger niazzir dae eil mel zza wo lol. Ngo Arbosobo leil nawo a; yar ngua leil bei har zaxr gger dae mel mel, ngua yar dax qiuxr dae mel leil hormo miur leixl.

7. Arbosobo Ddei Miar Hoba Bei A, Niul Sser Zoxr Mel Dder Niul Leil Gger

Ngua mel xi vae a zzirbae cirke sser ji a. Halae zzei lei cirke ca dae, yel ngua bbecir-bbexiubbo lei zzei koxl gger doxr nia, kebal sserddu lei nr zza. Nael ngua Arbosobo leil koxl dae a ngua leil beijjiu lol, ngua kebal zzirbae miur miar hal mel nr zo ssi, ngua, ngua bei ci xie mel bei a, ngua bei ci nr xie mel Arbosobo leil jia ji gger a ngua leil beijjiu lol. Arbosobo leil yarzi nawo, yar bei har dae mel miur lei nr miur, niul lei nr niul jiajia sser loxr ddo. Ngua bbecir-bbexiubbo lei zzei koxl gger ddu zza. Ngua sser labox zzirbae cirdoxr a dol dae lei sser loxr ddo. Halae zzaegu mel lei perlalamo vae wo ddo, sser lei yarzi sser ssei. Halae ake sser dae zzaegu cirke a lei ngua zzirbae ddux a vae si lei nr nga, Arbosobo ngua leil meixl gger lalnga. Arbosobo leil nr saexl su cirmelmel a lei ngua leil nolnger doxr. Ngo capor ngua nrnel jjia ddei zzirbae jia du lei a lei nr miur, nael Arbosobo seirseir meixl gger dae mel yarzi miur. Yar, yar xiar dae mel dax zox dae a ngua leil beijjiu a, qiuxl koxl dder ngua zzei maelmaerjjia koxl gger jjia a. Arbosobo mel eilne bei a yar leil nr saexl su

mel leil yar arsae yaa leil ddarzzi su mel leil guaxr dae mia lol. Yel mia su ca mel leil dder Arbosobo leil bbeixzae gger lol. Arbosobo mel cirza-hanga lei bei har zaxr dae ho a; nael yar dixl har dae nixixl ddei ci a sael yar niul leil gger. Hherdder niul armael anix leil zzaegu zaxr gger dae mel yar vaer ho a sael yar leil gger mel sael a nga. Arbosobo ngua lei bejiu a ngua xi vae a zzei ca dae zzu koxl gger jjia ho a. Yel ngo capor dder zzirbae zaxr a caezi zza ssi niazzir, caezi zza per zaxr loxr ho a nael yoxl caezi vae per zaxr a caezi vae eine xiar dae. Nael Arbosobo xiar dae mel niul ca mel xiar ci nr xie. Yar caezi zza teixl lei ho cir koxl loxr a, hherdder yar cirmuzil a lei kae cexr halcar ci a, Arbosobo dder yar leil caezi kae lol. Arbosobo caezi eil jiaxl yar leil nr gger, nael yar leil caezi eil jiaxl kae lol, guaxr lol. Halae yar Arbosobo leil visser dae hozze yar kae cexr. Arbosobo bei dae mel niul ca mel xiar lei xiar ci nr xie. Nael niul Arbosobo ddei miar hoba bei ssi a mel, niul sser zoxr mel dder Arbosobo niul leil gger var, hherdder Arbosobo ddei sul ber leil bbeix dae mel sael a nga bbeix: “Niul Arbosobo ddei goxr ddei leil hoba qiuxr a mel niul sser zoxr hazza dder yar niul leil gger,” eine bbeix a.